



UPA 2019/pkt.nr.57/ 209

Ulloq 19-03-2019

Mimi Karlsen

**Uunga siunnersuut: Imigassaq pillugu Inatsisartut inatsisaata allangortinneqarnera pillugu Inatsisartut inatsisaat nr. xx, xx.xxx 2019-imeersoq**

**Tallimangornerup arfiningornerullu unnuaani kiisalu ullut freerfiusussat nallilerneranni ullaassakkut 05.00-p tungaanut imigassamik sassaaliisalernissaq anguniarlugu Imigassamut inatsimmi § 26-p allangortinnissaanut siunnersuummik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. (Inatsisartunut ilaasortaq Justus Hansen, Demokraatit)**

Tooqissumik inuuneqarniaraanni inuuneq aqqissortariaqarpoq toqqissumik. Ulloq uippakajaarnassanngippat qanoq ingerlatissanerlutigu aqqissortariaqarparput. Taamaapportaaq meeqqat ilikkarluarsinnaasut toqqissimasut pilersissagutsigit meeqqat takorloorsinaasaannik, suut pilersaarutaanerinik ilisimatinneqassapput, aammalu killeqarnermik ilinniartinneqassallutik. Tassa inunnik isumaginnittut, ilisimasallit siunnersuutigisartagaat taama nipeqartarput.

Uagut aamma inatsisiliortugut taama toqqissisimanermik pilersitsisassaagut inatsisilioraangatta. Inatsisiliuussatta takorloorsinnaasassavaat suna siunertarigipput, qanoq ililluta anguniarneripput, qanorlu sivisutigisumik

tamanna anguniagaq ingerlanneqassanersoq. Taamaalilluta inuiaqatigiinni toqqissumik tatiginartumillu inatsisiliorsinnaasugut tatigineqarsinnaanerussiaaq.

Ajoraluartumik ukiut kingulliit uku Naalakkersuinikkut taama ingerlasoqanngilaq. Ukioq siulleq imigassap ersialaartikunnaarnissaa aalajangiuteriarlugu una sunngitsoq aamma ersialaartunngornissaa naalakkersuisut aalajangerpaat. Taava aappaagu suna allanngussava?

Inuit Ataqatigiit tulluusimaarutigaarput imigassamik atonerluinerup millisarnissaanut WHO-up innersuussataatut iliornitta kingunerimmagu ukioq kingulliup imigassartornerup appariarujussuarsimanagera. Killilersuinngikkaluarluta, ersialaartitsiunnaarnerup kingunerisai maanna ersertut, suli ukiut arlaqarnerusut ingerlanerini takussutissamik takorusukkalarput.

Maannali naalakkersuisut inatsisissamik siunnersuuteqarput imigassap assersorneqarnissaa pisariaaruttoq, ersiinnalissasorlu. Tamannalu siunnersuut ilaqutariinermut peqqinnermullu ataatsimiitsitaliamut aammalu inuussutissarsiornermut ataatsimiitsitaliamut ingerlateqqikkumavarput, taakku meeqqat ilaqutariillu atugaannik ilisimasalinnik isumasiuisinnaanngoqqullugit. Aammattaaq niuertut qanoq isumaqarnerusut paasinierneqarnissaat kissaatigalugit inuussutissarsiornermut ataatsimiitsitaliamut ingerlateqqittussanngorlugu.

Inuit Ataqatigiinniit oqaatigeqqissavarput pinaveersaartitsineq inatsisiliornikkuinnaq ingerlanneqartariaqanngimmat, meeqqalli inuusuttuaqqat inersimasullu pitsaasumik peqqinnartunillu sammisassaqartinnequtaaq pinaveersaartitsineq ingerlanneqassamat. Tamanna ersialaartittuarparput kulturimut, timersornermut allanullu naleqartitanut siunnersuusuiortuartarnitsigut, tamannalu ingerlattuassavarput.

Suniluunniit aqqivigiumasatsinni aaqiinalersilluta inatsisiliarisagut kisimiillutik aqqiisinnaangillat aamma imigassamut inatsisiliornermi tamanna soorunami atuuppoq. Inatsisiliagulli tassaasussaapput aqqiivigerusutatsinnut toqqammavissiillutik sinaakkusiisussat. Innuttaasulli aqqiivigerusutatsinnut peqataasutut piginneqataasutullu misigitinngikkutsigit suleqataatinngikkutsigillu alloriarfigerusutarput ajornarnerulersarpoq.

Inuttut imminut akisussaafiginitta puigunnginnissaa uummammioriuarnissaalu ilinnut uannullu akisussaaffiliivoq. Siunissarpummi tamatta akisussaaffigaarput pisussaaffiliisoq.

Pinaveersaartitsineq, siusissukkut iliuseqarneq suliassa qarfiillu akimorlugit sulisinnaassuseqarneq imigassartoriaatsitta ullumerniit pitsaanerulernissaanut aaqqiissutissatta ilagaat.

Immikkoortoq 57, freerfinni ullaassamut nal 5-at tungaanut imerniartarfinni ammatitsisalernissaq itigartipparput, tassa pingaartikkatsigu imerniartarfiutillit oqariartuutigisimammassuk taama sivistigisumik ammatitsisarusugatik. Imerniartarfiit taama sivistigisumik ammatitsisarnianngippata naalakkiinnarsinnaangilagut freerfinni ullaassakkut nal 5-at tungaannut ammatitsinissaannik.

Taamaasilluta immikkoortoq 209 ilaqutariinnermut, aammalu inuussutissarsionermut ataatsimiitsitaliamut suliassanngorlugit innersuuppagut.

Immikkoortoq 57 itigartipparput.